

HIYBRIW

Hiybriw Biynimb Krays Ker

Mindeyak Gok Kuyip Minj Tikyak

Minim Nind Ninjep

Jiwda biynimb gok kuyip nep, yimb bap Hiybriw apay. Minj kun biy, Jiwda biynimb Jiysis nup chingyak gok kuyip, tikyak ak ninbun ak pen, bi kuyip minj tikip ak angyi, ma ninbun.

Minj kun biy, Jiysis nup kirgiy, Jiwda giyingipay rek gining geyak ninjiy, kuyip tikiy angyak, “Kanj siypsiyp tap gok pik simbongyinigipim ak, tap yikop kawnan pang ninjiy gipay rek giyingipim; Jiysis chinup nen angyi, likañ nuk key Nop nup simbongak ak, tap yomb yimb angyak.”

Minim Ar Keykey Mindip Rek:

Gor Ninuk biyomb Nop rek nep mindip minim ak mindip, chapta 1:1-3.

Jiysis biyomb, enjol gok sikoy minim ak mindip, chapta 1:4-2:18.

Jiysis biyomb, Mosis yip, Josiwa yip bi sikoy minim ak mindip, 3:1-4:13.

Bi simbongep nind mindyinigipay gok, wong giyak ak yikop rek giyak; Jiysis gak ar ak, tap yomb yimb gak minim ak mindip, chapta 4:14-7:28.

Jiysis bi Gor nup simbongep yomb yimb ak, likañ nuk key ak Nop nup simbongek mey, Gor “tep” angek, tip ma kumningamb minim ak mindip, chapta 8:1-9:28.

Meymey siypsiyp pik simbongyĩngipay ak, yikop pik simbongipay; Jiysis chinup angyi kumak ak, ñin nokom yimb simbongek mey, kim amjun rek ayip minim ak mindip, chapta 10:1-39.

Gor nup gosimb niñon chinup kond mindeningamb angyi, nup nep kond mindpay minim ak mindip, chapta 11:1-12:29.

Yerip gey Gor niñek tep giningamb minim ak sek, minim anğ day jiwak ak sek mindip, chapta 13:1-25.

Gor Ñinuk Chinup Minim Anğñak

¹ Gor basind apis ikop kuyip minim anğning, bi minim nup anğep gok gek, minim nup ar ak wisin niñiy akan, day niñiy akan, gos kiyk namb okok niñiy anğñiyĩngipay. ²⁻³ Nind kun giy gek, biynimb gok kuyip anğñiyĩngipay ak pen, ñin kisen mindpun biy, Ñinuk ak key yokek apiy, chinup minim anğñak. Pen Ñinuk nuk key ma mindip: Nop mindip rek nep mindip. Nuk kunep Gor ak mey, chinup sup melik punğyomimb. Nop anğek, Ñinuk miñmon tap okok mañgiysek alwol gayek mey, miñiy mañgiysek kond mindip. Nuk nep minim anğek, miñmon tap okok timey ma gip, mindep nep mindip. Tap siy tap timey gach chinup ak nep angyi, kumiy tip ak tikjakiy, am Nop ñin yipund kind okok ken mindiy, wong jimñiy gipiy.

Enjol Gok Kayan Rek Mindpay; Jiysis Mey Biy-omb Yimb Mindip

⁴ Nuk enjol gok rek mer: nup Gor Ñinuk apay rek, nuk Biyomb yimb. Yimb nuk yiy ar biyoŋ mindip. ⁵ Gor enjol nuk gok kuyip, bap minim aŋgiy apkop, “Miñiy nup dipiyn ak, yip ‘Nop nuk;’ yand nup ‘Ñiyand’ aŋgiy” ma aŋgak. Akan pen: “Yip ‘Nap nak;’ yand nip ‘Ñiyand’ aŋgiy,” ma aŋgak. Ñinuk nup nep, minim kun ak rek aŋgak.

⁶ Pen Ñinuk key yimb ak, mankumb biy yokniŋ, enjol gok yimb nup dand araniŋgiy aŋgak. ⁷ Pen enjol gok kuyip, minim ak aŋgiy aŋgak, “Enjol nuk gok gek, key yimb mindiy, yiŋgen rek diy opay aŋgak.” ⁸ Pen Ñinuk nup minim ak aŋgiy aŋgak:

“Gor. Nand kiŋ gunap monmon gipay rek ma giniŋgamban; suŋ-tep mindiy, biynimb gok perper kond mindeniŋgamban. ⁹ Mindrep gipay ak nip tep gip, pen mindrep ma gipay ak nip tep ma gip. Kun ak nip aŋgen, Biyomb key yimb mindpan. Kun ak buŋgiy nand gok, beŋ nip okok mindpay; nand mey Biyomb yimb mindpan aŋgak.”

¹⁰ Minim gunap sek aŋgiy aŋgak, “Nand Biyomb wosrey kondon okok mindiy, mankumb biy sek, semb biyoŋ sek alwol gaynak.

¹¹⁻¹² Tap kun gok mindiy, kurginiŋgamb rek ayip ak pen;

nand mindnep mindeniŋgamban.

Tap kun gok, chech wor ay yapek,

tunŋasik key siŋak ay,

kisenimb aypay rek giniŋgamb ak pen;

nand Biyomb chin ak, kun ak rek ma giniŋgamban.

Nak mindpan rek nep mindeningamban angak.”

¹³ Pen Ñinuk nup minim bap sek angak:

“Nand ñin yipund kind yand akniy bisinğ mindey, tap yerip yerip nip miluk niñbay gok mañgiysek, talak miñgan nip okok ayniñgayn angak.”

Pen enjol gok kuyip, Ñinuk nup angak kun ak rek, ma yimb angak. ¹⁴ Kun ak enjol gok yerip rek mindpay? Kiyk Gor nup wong giñemb gok mindyinğ, biynimb nuk perper mindeningambay anğiy niñimb gok kuyip, kond mindpay.

2

Gor Chinup Dak Ak Tap Yomb Yimb

¹ Kun ak minim anğñey niñbun ak, pisnep dinjun. Pen direp ma giniñgambun ak, gos yesek gunap niñiy, yesek kind okok amniñgambun. ² Enjol gok nep, low minim ak dand apiy, Mosis nup ñiyak ak pen; biynimb minim kun ak kirgiyak gok, yiwur yomb yimb diyak. ³⁻⁴ Kun ak chin Gor Ñinuk minim tep dand wip ak kirgiy, kim amjun rek ma ayniñgamb. Ñinuk ak key, minim kun ak dand apek, biynimb niñiy diyak gok, chinup minim niñind yimb kun ak niñnimimb anğiy, anğñirep giyak. Pen gos kiyk anep niñiy ma anğyak; Gor kiy yip mindakniñ, tap mageprek gunap giyinğ, chinup anğñiyak. Gor gos nuk key niñiy, Kawnan nuk ak yokek ap, biynimb gunap yip mindiy, key yimb geyak kunep niñnuk. Kun ak mey, minim tep nuk ak, niñind yimb aspay anğiy niñnuk.

Jiysis Nep Chinup Dak

⁵ Pen Gor chinup di nuk yip jimñiy aysap minim apun ar ak, enjol gok biyomb koyon rek, chin kayan rek ma mindpun. ⁶ Minim ar kun ak, Baybol buk ak tikiy angyak:

“Gor. Nand biynimb gok kuyip gos ninjy dipan. Nand rek ma mindpay; biynimb yikop ak pen, yenen kuyip kond mindrep gipan? ⁷⁻⁸ Nand genak, enjol gok biyomb rek mindeyak; biynimb gok tam okok rek mindeyak ak pen; miñiy biynimb gok kuyip gey, yimb mindek, tap manjiysek kond mindpay angyak.”

Minim kun angyi tikiyak ak ninbun: miñiy tap gunap nep kond mindpun; ñin kisen ak apek, tap manjiysek kond mindeniᅅgambun.

⁹ Gor Ñinuk Jiysis nup yokek ap mindek ñin ak nep, enjol gok, biynimb yomb rek mindeyak: nuk bi yikop rek mindek. Pen yiwur yomb diy kumek, Gor gek miñiy Biyomb mindakniᅅ, yimb nup nep apay.

¹⁰ Gor nuk Biyomb tap okok manjiysek gay kond mindip ak, ninrep gip ak mey, biynimb kuᅅaynep di miñmon tep nuk ak ayning, Ñinuk Krays nup yokek apiy, minim nup ak ninjy, miker ar keykey dak rek, chinup di Nop yip jimñiy ayip. ¹¹ Pen chinup dek, biynimb nuk mindpun ak, Bapiy chin nokom yimb. Chinup gek, nuk suᅅtep mindip rek mindpun ak mey, mam ay anᅅning nambin ma dip; wisimb yapiy nep anᅅgip. ¹² Nuk Nop nup anᅅgak:

“Mam ay sikop kuyip, kesim nip ak diñiyiᅅg, kamep anᅅyiᅅg, yimb nip dand araniᅅgayn anᅅak.”

13 Pen minim bap anᅅak:

“Nup gos sek kond mindeniᅅgayn; yip direp giniᅅgamb anᅅak.”

Pen bap anᅅak:

“Gor ñapan yip anᅅak gok yip, mindpiyn biy anᅅak.”

Jiysis Chinup Diyn Anᅅiy, Biyimb Rek Ay Wak

14 Ñapan anᅅak kun gok, kiyk biynimb ak mey, nuk biynimb yimb bap ay apiy, bi biynimb gek kumbay anup ñanᅅjiwyokak. 15 Kun gek mey, biynimb kumniᅅgambun anᅅiy pernep gos par ay mindeyak gok, perper mindeniᅅgiy rek ayip. 16 Pen enjol gok direp giyn anᅅiy ma gak; Ebraham Gor nup gosimb niᅅak rek niᅅbun kiñiᅅ ak, direp giyn anᅅiy kun gak. 17 Ar kun ak nep, Jiysis chin mindpun rek biyimb ay apiy, bi Nop nup simbonᅅep tep chin ak mindiy, chin tap siy tap timey giy, Gor yip jimñiy mindonjun rek ma ayek, chinup di Nop yip jimñiy ayniᅅg kumak. 18 Pen ap man ar biy mindiy, chinup miker yerip yerip gip ak, nup kunep gek mey; niᅅrep gip rek, chinup simb niᅅiy kond mindrep giniᅅgamb.

3

1 Kun ak mam ay Gor niᅅek tep gip gok. Jiysis bi Gor nup simbonᅅep yomb yimb chin ak nup gosimb niᅅyiᅅg, Gor nup kisen gipun ak, nuk Bi yerip rek ak niᅅrep ginjun.

² Pen nimb gunap angningambim “Basind yes chin Mosis biyomb yimb; Jiysis bi yikop rek ayip angningambim.” Pen Jiysis nup gos kun ak rek ma niñnimimb. ³ Gor Mosis nup, Ñinuk nup yimb dand ar biyon aranak rek; ma gak. Bi korip gipay gok yimb dand aranbay ak pen; korip gipay gok tap yikop; yimb ma mindip. Kun ak rek, Jiysis Bi yimb sek, Mosis beñ nup okok mindip. ⁴ Korip tap gok biynimb gaypay ak pen; Gor tap okok mangysek alwol gayak.

⁵ Pen niñind: Mosis Gor biynimb nuk namb ak wonḡ giñirep giyḡ, Gor chinup kisen giningamb rek, minim tep gunap anḡñak. ⁶ Pen Krays Gor Ñinuk yipund giy ak mey; chinup Gor kiñiñ nuk mindpun gok, bi korip nop nimb rek, kond mindrep gip. Nup chingiy nep mindon mey, andkind apek, biynimb nuk nep mindoningambun. ⁷ Kun ak Gor Kawnan angak rek niñjun. Nuk angak:

“Ñin biy minim yip ak anḡey niñiy, niñdinimimb. ⁸⁻⁹ Nasind naps sikop wosrey, simiy ñin jiwiy omiñal miñmon nep namb okok mindey, kuyip tap mageprek gok giyḡ, kond mindenik ak pen; minim yip ak ma niñiy, gos kiyk keynep niñiy gey amyḡgip. ¹⁰⁻¹¹ Kun gey, yip yiruk yimb gek anḡnik, ‘Per minim yip ak ma niñdiy kun gipay ak, yand yip mindiy, añiñ ay mindrep giniñiy anḡnik ak, ma diniñgambay. Pisnep mer aspiyn angak!’”

¹²⁻¹³ Kun ak mam ay sikop. Gor minim ak kirgiy, gos nimb key niñnimimb rek ayip ak, niñrep ginimimb. Miñiy Gor minim niñep ñin biy, namam

nanay gok yip, minim tep ak minek minek anḡ amiy apiy giyḡ, mindrep ginimimb. Mer ak, Gor nup minim ak kirgiy, gos yesek ar ak apek niḡdand amiy, apyap pikniḡgambun.

¹⁴ Pen Krays minim nind niḡiy anḡñinik ak, niḡiyḡ nep mindiy mey, biynimb nuk yimb mindoniḡgambun. ¹⁵ Baybol buk ak tikiy anḡyak: “Miñiy Gor minim nup ak niḡiy, yiruk ma niḡnimimb. Wosrey minim nup niḡiy diyokpik rek, ma ginimimb anḡyak.”

¹⁶ Biynimb an Gor nup minim ak niḡiy, ma niḡjun anḡyak? Mey Yisrel biynimb; Mosis Yijip nimb dand awak gok maḡiysek. ¹⁷ Pen biynimb an simiy ñin jiwiy ñin jiwiy Gor minim ak ma niḡey, kuyip niḡek tep ma gak? Mey Yisrel biynimb; tap siy tap timey giy, miñmon nep namb okok taḡ taḡ, tokiy ay kumyak gok nep. ¹⁸ Gor biynimb minim kilis anḡiy, ap yand yip ma mindeniḡgambay anḡak gok an? Mey biynimb minim nup ma niḡniḡgambun anḡyak gok nep. ¹⁹ Kun ak niḡbun: nup gosimb ma niḡiy, nup ma chiḡyak rek, am nuk yip mindrep giniḡiy rek ma ayak.

4

¹⁻³ Pen chinup biynimb kisen dip gok, nund yip mindrep ginjun rek ma ayip anḡiy, gos ak ma niḡjun. Pen minim tep nup niḡbun ak, niḡrep giyḡ mindenjun. Mer ak, basind apis sikop minim nuk ak niḡiy, niḡind anḡip anḡiy pen, ma giyak rek giniḡgambun. Kiyk minim nup ma dey, minim kilis anḡiy anḡak, ‘Kuyip den, ap yand yip

añiñ ay mindeniñgiy rek ma ayip angak.’ Tap alwol gayak ñin ak, tip kuyip ak gayrep gak ak pen; minim nuk angak gok, niñind anjip anjy nup ma diyak rek, kuyip kirgak.

⁴ Baybol buk ak tikiy angyak,

“Gor ñin onep kangol ak, miñmon tap gok manjiysek gaydiy, ñin ar ak añañ ayin anjy, yikop mindek angyak.”

⁵ Pen minim kun ak nep tikiy angyak,

“Kiyk ap yand yip añañ ay, mindrep giniñgiy rek ma ayip angyak.”

⁶ Pen biynimb nind gok, gunap minim tep nup ak kirgiy, nup ma chingeyak; biynimb kisenimb gok diniñgayn angak. ⁷ Kun ak biynimb minim nup niñiy kirgiyak gok kumey, simiy kunaynep yinek, basind yes Depiyt Baybol buk minim anğambun ak tikiy angak:

“Ñin biy, Gor minim ak niñying, yiruk ma niñnimimb; anğnimuñ rek nep niñiy, ginimimb angak.”

Pen tip ak, “Ñin biy” angak kun ak niñbun: ñin nuk biynimb diniñgamb ñin ak, mindrep nep mindip.

⁸ Pen nimb anğniñgambim, “Gor wosrey yip ker apiy, añañ ayrep giying mindeniñgambim angak ak, biyomb Josiwa basind apis sikop kuyip, dand miñmon Keynan amek, mindrep giyak ar ak, angak anğniñgambim.” Pen ñin kun ak nep ma angak; am miñmon Keynan mindyakniñ, minim kun ak tip angak. ⁹ Kun ak chin nuk yip jimñañiy mindiy, nuk yip añañ ay mindrep ginjun rek ayip. ¹⁰ Nup chingiy, nuk yip añañ ay mindrep

giniᅅgambun aᅅgip minim kun ak; tap kilrimey akaᅅ, yerip yerip gon, Gor chinup diniᅅgamb aᅅgiy niᅅbun gok kirgiy, nuk ñin onep kaᅅgol ak tap gaydiy, minek ar ak, aᅅiᅅ ay yikop mindek rek mindoniᅅgambun. ¹¹ Kun ak aᅅiᅅ aᅅiᅅ ma ayjun; chinup kinjeᅅ pisnep pindak rek, korip miᅅgan amiy, nuk yip aᅅiᅅ ay mindrep giᅅjun. Mer ak; biynimb chin wosrey mindyiᅅgiᅅay gok, apyap pikyak rek ak giniᅅgambun.

¹² Yenen: Gor minim nuk aᅅgek, kim mindeniᅅgambun ak, baynat rek kind yimb. Namb chinup biyaᅅ amiy, gos tep niᅅbun akaᅅ, gos timey niᅅbun ak, di mis ayek niᅅrep giᅅpun. ¹³ Yerip yerip giᅅpun gok, Gor niᅅmindakniᅅ giᅅpun; kapkap weygiy giᅅjun rek ma ayip. Pen nuk nep chinup kor giy, yerer giᅅpun minim ak, aᅅgᅅniᅅakniᅅ aᅅgᅅniᅅgambun.

¹⁴ Kun ak Bi Gor nup simboᅅgeᅅ yomb yimb chin ak, am Nop yip mindip rek, minim tep niᅅjiy dipun ak, dineᅅ mindonjun. ¹⁵ Nuk ap lum ar biy mindyiᅅgiᅅ rek, tap siy tap timey chinup lipiᅅg dand animuᅅ rek ayip gok sek, miker chinup yerip yerip giᅅ gok sek nup kunep gak ak pen, nuk timey ma gak. Kun ak miker yerip yerip chinup giᅅ ak niᅅrep giᅅ rek, chinup simb yimb niᅅjiy, ¹⁶ bi nambnimb chin tep yimb ak mindip. Kun ak Nop Biyomb jel giᅅ ak nup pirikiy, ma kirginjun. Chinup simb niᅅjiy, Ñinuk nup yokek apiy kumak rek, mindip maᅅ siᅅak amiy, tap timey giᅅpun gok aᅅgyikon, chinup dep rek ayek, dinimuᅅ.

5

¹ Bi Gor nup simbonjep gok manjiysek, bi yikop biynimb namb okok nimb ak pen, Gor kuyip dek wong nup ak giying, biynimb tap siy tap timey giy, meymey siypsiyp dap ñey, bind ar ak pikdangiy, Gor nup simbonj ñimbay. Wong kiyk bap pen, biynimb yikop Gor nup niñey tep gek, tap gunap dap ñey pikñimbay. ²⁻³ Pen bi Gor nup simbonjep kun gok, biynimb yimb gok mey, kiyk key kunep tap siy tap timey giy, Gor nup tap simbonj ñimbay. Kun ak biynimb niñrep ma gipay gok, apyap pikning rek gey, kuyip simb niñiy, minim sayn apay. ⁴ Kiyk key biyomb mindon angiy, wong kun ak ma dipay; Gor Eron nup angek giyingip rek, kuyip angek gipay.

⁵ Ar kun ak nep, Krays yand biyomb mindiy, biynimb gok kuyip diyn angiy ma angak; Nop nep angek, chinup nen Nop nup angniñ mindip. Nup angak:

“Miñiy yand nip Ñiyand; nand yip Nap nak angak.”

⁶ Pen Ñinuk nup minim bap angak:

“Nip aspiyn: nand bi yip simbonjep Melkiysadek rek ak, perper mindeningamban angak.”

⁷ Pen Jiysis man ar biy mindiy, nup ñangning geyak, Nop nup siy angying, menj mingga dand araniy angak, “Yip kond mindenimin. Pen kun ginimin ma angningayn; nand Biyomb ak, key niñban rek yip ginimin angak.” Kun angek, nup kond mindakniñ, kumiy tip ak tikjakak.

⁸ Nuk Biyomb, Gor Ñinuk yimb ak pen; chinup gip rek nep nup gak. Nop angak rek giying, miker

yomb ak dak. ⁹ Nop minim angek, mangiysek gak ak mey; bi suņ-tep biynimb minim nup niņiy dipay gok, di Nop yip jimñiy ayek, perper mindeniņgambay. ¹⁰ Pen ar kun ak nep, Nop angak, “Nand bi yip simbongep Melkiysadek rek ak mindeniņgamban angak.”

Ñapan Naņ Gos Niņbay Rek Ma Niņjun

¹¹ Minim tiksipiyn kun biy rek, kuņay mindip ak pen; kasek ma niņbim ak, angen kosyam niņnimimb rek ayek kirpiyn. ¹² Nimbip per anğñimbun ak niņrep giy, biynimb gunap kuyip anğñimbikip ak pen; kasek ma niņiy, minim nind niņep gok, nimbip tip anğñemb rek ayip. Miñiy tap kilis ñiņnimimb rek ak pen; tiy ñimb nep mindpim. ¹³ Ñapan naņ tiy ñimbnep mindpay gok; miñ ar ak tep, miñ ar ak timey anğiy, ma niņrep gipay. ¹⁴ Pen biynimb gos sek gok gi dand amiy, ar ak gep, ar ak ma gep anğiy, niņrep gipay.

6

Ñapan Naņ Mer Anğiy, Minim Niņind Ar Ak Dinjun

¹ Krays minim nimbip per anğñimbay gok, soy anğiy soy anğiy ma anğniņgayn. Korip giniņ, sap piņiy tip tuņgiwiy, tip ak piņiy, tip ak piņiy ma gipay. Kun ak chin keynep kilrimey giy mey, Gor biynimb nuk mindeniņgambun anğiy, gos niņyiņgipun ak kirgiy, Gor Ñinuk nup yokek owak rek, chinup diniņgamb anğey niņnuk minim ak pisnep diy, nup chingrep giy mindenjun. Sap ak tuņgiwiyiņg, tip ak piņyiņg ma ginjun. ² Gor

nup gosimb niñiy, ñiñg pikpun minim ak; ñin jun ar ayey, Gor Kawnan chinup wip minim ak; biynimb kumiy tikjakiy kuyip bilok ayek, gunap yiwur per diniñgambay minim ak; tip ma añgniñgayn. Gor minim nind niñbik kun gok, gos niñnep mindyiñg, minim nuk gunap niñjun. ³ Kun ak Gor chinup kond mindakniñ, minim kun gok kirgiy, minim gunap añgon niñrep giniñgambim.

⁴⁻⁶ Gor Ñinuk chinup añgiy yokak ak, nup gosimb niñiy, Kawnan nuk ak diy, pen nup kirginiñgambun ak; kisen yergiy nup tip ak gosimb niñiy, nup chiñgiy, biynimb nuk mindoniñgambun? Chinup direp giyiñg kond minden añgiy, tap mageprek gok gek niñnuk ak pen, nup kirginiñgambun ak; mon kiros bak biyon ñañgrimbikiy, añggiwyak rek ak giniñgambun. Biynimb kun giniñgambay gok, tip ak añgon nup gosimb niñniñgiy rek ma ayniñgamb.

⁷ Gor woñg day nuk ak gek, miñmon pikyiñg tap jakrep gakniñ, nup tep yimb giniñgamb. ⁸ Pen kipil ñiwñiw sek gok nep jakniñgamb ak; kirgek pisnep sañgiy dek, kisen sup ñek yinimur rek ayip.

⁹ Pen bunñiy tep yand gok. Minim yomb rek aspun ak pen, Gor nup kirpim añgiy ma aspun; niñrep gim añgiy aspun. Yenen: biynimb nuk mindiy, biynimb nuk gok gipay rek gipim ak niñbun. ¹⁰ Gor ker mindpim ak, monmon ma giniñgamb. Nup gosimb niñiy, biynimb nup gunap kuyip, per direp gipim ak, nuk sakiy ma giniñgamb. ¹¹ Pen chinup tep giniñgamb ak; nimb

mangiysek ar kun ak nep gi mindiy, am nuk yip mindrep ginjun angyi gos niñbim rek giniñgamb.

¹² Yiruk yiruk ginimun rek ayip ak, niñrep ginjun. Nup gosimb niñiy, minim anğayak ak gos sek kond mindiy, chinup direp ginimun rek nep mindon mey, Nop chinup giniñgayn anğak rek giniñgamb.

¹³ Gor basind yes Ebrahim nup minim niñind yimb ak anğniñg, biyomb nuk rek bap sek ma mindek niñiy, bi gunap yimb kuyip ma anğak; yimb nuk key angyi anğak, “Yand mindpiyn rek, nip niñind yimb aspiyn; ¹⁴ nimbip kond mindnikniñ, biynimb nand kuñay yimb mindeniñgambay anğak.” ¹⁵ Ebrahim minim nuk kun ak niñiy, kapkap kond mindek mindek, anğak rek nep gak.

¹⁶ Chin Jiwda biynimb minim kilis niñind yimb anğniñg, biyomb bap yimb nup angyi, niñind yimb aspun apun. Kun gon, biynimb gok niñiy, ak niñind yimb aspay apay. ¹⁷ Kun ak rek, Gor yimb nuk key angyi, kuyip den ñapan yand mindeniñgambay anğak ak, ar bap key ma giniñgamb. ¹⁸ Kun ak, chin biynimb tap siy tap timey giy, pirik nup ker opun gok; gos sek mindenjun. Yimb nuk ak angyi, niñind yimb apiyn anğak ak; key ma giniñgamb. Chinup diniñgayn anğek, kond mindpun rek nep giniñgamb. ¹⁹ Gor korip ñiluk miñgan suñ-tep yimb ak chech band yiwgek, nup windin ma niñbun ak pen, minim niñind yimb ak anğek, kond mindpun. Minim kun ak, korip ñiluk miñgan nuk ak nimb wip ak mey, kamb kilis rek mindip ak; kawin kawin ma

giningamb. ²⁰ Biyomb Gor nup simbonjep chin ak, Melkiysadek wonj gak rek giyn anjiy, tip chinup ak diy, tap siy tap timey gipun rek, Gor korip ñiluk miñgan suñ-tep yimb ak nind amiy, chinup nen Nop nup anjniñ mindip.

7

Binak Melkiysadek Yimb Yomb Dak

¹⁻² Melkiysadek kun ak nuk kiyn mindiy, miñmon Salem kond mindyinj, bi Gor nup simbonjep ak kunep mindyinjip. Yimb nup ak tunjandikiy, “Bi suñ-tep yimb apay.”

Pen biyomb gunap ap, basind yes Ebrahim nup timey geyak, kuyip yuk yokiy, tap tep tep gok dand awakniñ, Melkiysadek ap nup kinjenamb ak niñiy bilesiym gek, tap piling dand awak gok, bilok Melkiysadek nup nokom nokom, Gor nup ñimbay rek ak ñiy, nuk tap manjiysek onep anjip gok dak.

³ Bi kun ak Gor nup simbonjep ak pen, nonim kiñinj ak kun giy mindip, nop nusind kiñinj ak kun giy mindip anjiy anjey, ma niñbun. Pen nup tikyak ñin ak, kumak ñin ak anjiy kunep anjey ma niñbun. Nuk bi Gor nup perper simbonjip, Gor Ñinuk rek mindip.

⁴ Gor basind yes Ebrahim nup niñek tep gek, biyomb mindeningamban angak ak niñbun: nuk biyomb mindek. Pen Ebrahim Melkiysadek nup biyomb yimb mindek ak niñiy, tap piling dand apek gok, bilok nup gunap ñak.

⁵ Ak nind yimb kun gak. Kisen Mosis nup tikeyak yomb giy, Baybol buk ak tikiy anjyak,

“Ebrahim tikek tik dand amiy, biynimb Liypay kiñiñ mindpay gok, Gor woŋg gey, tap yerip yerip diniŋgambim gok, kuyip bilok nokom nokom opriyñ ñiy, nimb onep anjip ak dinimimb aŋgak.” Kun ak chin Mosis low ar ak niñiy, ñimbem mam Liypay kiñiñ mindpay gok kuyip, per tap opriyñ ñiyiñgipun.

⁶ Pen Gor basind Ebrahim nup niñek tep gek aŋgak, “Biynimb nip gok direp giniŋgayn aŋgiy” minim aŋgñak ak, nuk bi gunap kuyip opriyñ ma ñiyiñgip; pen Melkiysadek ap nup niñiy, bile-siy m gek tap dand owak gok, gunap bilok nup opriyñ rek ñak. ⁷ Kun ak Melkiysadek bi Gor nup simboŋgep yomb yimb, basind Ebrahim bi yikop rek ayek, kun gak. ⁸ Bi Liypay kiñiñ Jiwda biynimb opriyñ bilok ñiyiñgipay gok, mind dand amiy tokiy ay kumbay ak pen, Baybol buk ak, Melkiysadek kumiy woŋg kun ak kirgak aŋgiy, ma tikyak.

⁹⁻¹⁰ Ebrahim Melkiysadek nup tap bilok ñak kun ak, ñapan ma tikak ñin ak ñak. Kisen mey, Aysek nup tikek, Aysek pen Jekop nup tikek, Jekop Liypay nup tikek, tikey amiy apiy gek, Liypay biynimb kun gok Gor woŋg gey niñiy, kuyip tap bilok ñimbay. Pen Ebrahim Melkiysadek nup tap opriyñ ñak ak, kuyip ma tikyak won ak ñek mey, kiyk sek, layn kiyk gok sek Melkiysadek nup, opriyñ ñemb rek nep mindeyak ak niñbun.

Bi Gor Nup Simboŋgep Kisenimb Ak, Bi Nind-nimb Gok Tip Kuyip Ak Dak

¹¹ Mosis Gor minim tikiy, kun kun ginimimb aŋgek niñiy, Jiwda biynimb meymey siypsiyp tap

gok dand amiy, Liypay bi gok kuyip ñey, kiyk pikdangiy Gor nup simbongyingipay ak pen; ak yikop ar ar nep giyak. Kun gey, Gor biynimb nuk mindembinup, bi kisenimb Melkiysadek rek key bap yokek awak ak ma yokpikop; Liypay bi gok, Gor nup simbongying nep mindembiyap. Pen tep ma gek, Gor kuyip kirgiy, bi kisenimb Melkiysadek rek bap yokak. ¹² Bi nup simbongep nindnimb gok kuyip kirgak rek, simbongyingipay miñ ar ak sek kirgak. Kun ak miñ kisenimb chinup angñimb ak nep dinjun.

¹³ Bi simbongep kisenimb yokak ak, Liypay biynimb tik dand amiy nup ma tikyak; ¹⁴ Jiwda kiñij ak nep tik dand amiy nup tikyak. Pen Mosis bi Jiwda kiñij gunap, Gor nup simbongniingiy angiy, minim gunap ma angak. ¹⁵⁻¹⁶ Kun ak niñrep gipun: Gor bi nup simbongep nindnimb gok kuyip kirgiy, bi pernep wong giningamb kun ak, Melkiysadek rek bap dak. ¹⁷ Yenen: Ñinuk Krays nup angak,

“Bi yip simbongep Melkiysadek rek mindeningamban angak.”

¹⁸⁻¹⁹ Liypay kiñij ak tap ñiñemb pikdangiy, Gor nup simbongyingipay ak pen; miñ nindnimb ar kun ak, perper mindonjun rek ma ayek, Gor gos nuk key niñiy, miñ kisenimb ar bap chinup yomak. Miñ kisenimb dipun ar kun ak, tep yimb. Diy mey, Gor yip nep mindoningambun angiy, gos sek kond mindpun.

²⁰ Bi Gor nup simbongep nindnimb kun gok kuyip, minim angay, bi yip simbongep mindeningambim angak ñin ak, minim gunap sek

angayak ak pen; wong kun ak per gem amnimun ma angak. ²¹ Pen Jiysis bi nup simbonjep nuk ak angayning, minim angay angak:

“Nand per bi yip simbonjep ak mindeningamban. Yand Biyomb ak ninind yimb apiyn; kisen minim bap key ma angningayn angak.”
²² Gor Jiysis nup minim angayak kun ak ninbun: minim nindnimb ak wos mer ak pen; minim kisenimb ak wos yimb.

²³ Bi Gor nup simbonjep nindnimb gok, kunaynep rek wong kun ak diyak. Bap kumek, kisenimb bap angey, wong kun ak gi mindyngip; ak kumek kisenimb ak mindyngip; ak kumek kisenimb ak mindyngip ak mey, bap per ma mindyngipay. ²⁴ Pen Jiysis kun ak rek ma giningamb; nuk per kim mindeningamb ak, wong kun ak ma kirginingamb. ²⁵ Nop nup per angningimun rek mindip ak, biynimb Nop ker mindning, nup angeningambay, kuyip pisnep diy kond mindeningamb.

²⁶ Bi simbonjep yomb yimb chin kun ak; Gor nup simbonjep yimb. Nuk bi sun-tep tap siy tap timey siskoy gunap ma giy; bi gunap gipay rek mer: mindrep yimb gip ak, yimb nuk yiy ar biyon mindip. ²⁷ Bi Gor nup simbonjep yikop gok, gunap per tap siy tap timey kiyk key gipay rek, tap pik Gor nup simbonjep ñiy, kisen biynimb gunap timey gipay rek, tap pik simbonjep ñimbay. Pen Jiysis chinup biynimb mangiysek, tap siy tap timey gipun ak niniy, minek nokom yimb mon bak biyon simbongak. Mey tep!

²⁸ Mosis minim tikek niñiy giyiñgipay ar ak; bi Gor nup simboñgep gok sek, biynimb yikop gok sek suñ-tep yimb mindeniñgiy rek ma ayak. Pen Gor minim nuk kisenimb añgayak ak, Ñinuk suñ-tep Bi Gor nup simboñgep perper mindeniñgamb ak, chinup añgayak.

8

Jiysis Bi Gor Nup Simboñgep Yomb Yimb; Gor Añgniñep Korip Semb Biyoñ Ak Mindip

¹ Pen minim aspun kiñiñ ak kun giy mindip; Bi Gor nup simboñgep yomb yimb chin ak, am Nop ñin yipund kind okok ken mindip. ² Gor añgniñep korip tep ak am minden añgiy, Nop korip ñiluk miñgan suñ-tep yimb semb biyoñ amiy, bi namb-nimb chin ak mindip. Gor añgniñep korip kun ak, biynimb ma giyak, Gor nuk key gak.

³ Pen bi Gor nup simboñgep yomb yimb lum ar biy gok, kaw meymey tap gok dap ñey, gunap pik Gor nup tep añgiy, gunap pik tap siy tap timey giy gach sek mindipay rek, niñiy kirginimin apay. Jiysis gipay ar kun ak rek key kumiy, tip ak tikjakak. ⁴ Bi Gor nup simboñgep yikop gok Mosis low añgiy tikak rek niñiy, tap pik Gor nup simboñgyiñgipay. Gor añgak rek, bi Liypay kiñiñ tikiyak gok nep, kun giyiñgipay. Jiysis nup Liypay kiñiñ tik dand apiy ma tikiyak rek, nuk lum ar biy nep mindiy, kiy yip tap pik simboñg ñiyiñg ma mindombikop. ⁵ Pen Gor nup lum ar biy, tap pik simboñgyiñgipay ak, kawnan pañg niñiy gipay rek nep giyiñgipay; tap yimb ak mindip semb biyoñ. Mosis Gor añgniñep sel korip ak giniñg

gakniŋ, Gor aŋgak, “Chir yirik okok mindiy, ‘Ser korip yip ak giy, tap gok kun kun giy aynimin apiyn’ rek nep, ginimin aŋgak.” Aŋgak kun ak, semb biyoŋ mindip rek, ginimin aŋgiy nup aŋgak.

⁶ Bi Gor nup simboŋgep yomb yimb chin Jiysis, bi Gor nup simboŋgep nindnimb gok, biynimb kuyip giyŋgipay rek ma gip; nuk bi nambnimb chin tep key yimb mindiy, Nop chinup minim kisenimb tep ak aŋgiy, aŋgayak rek gip.

⁷ Pen minim nind aŋgayak ak tep gombikop, minim kisenimb ak ma dand opkop. ⁸ Biynimb gok mindrep ma giyak rek, Gor bi minim aŋgep nuk gok kuyip, gos ñek minim tikiy aŋgayak:

“Biyomb aŋgip, ‘Kisen yand Yisrel-Jiwda biynimb kuyip, minim tep kisenimb aŋgayŋgayn.

⁹ Nusind nupis yes gok kuyip, ñin ar ay dand Yijip nimb winik ak pen, minim aŋg ar nokom ay aŋgnuk ak ma niŋeyak, kuyip kirginik. Minim kun ak rek, kuyip tip ak ma aŋgŋŋgayn’ aŋgak.”

¹⁰ Pen minim bap aŋgak:

“Kisen yand Yisrel biynimb gok yip, minim aŋg ar nokom ay, gos tep yand niŋbiyn rek ak ñen, minim kil tikayey per mindek niŋbay rek ak, niŋniŋgambay. Kun ak yand Gor Biyomb kiyk mindeniŋgayn; kiyk biynimb yand mindeniŋgambay. ¹¹ Minim yip ak niŋiy, biynimb yand ker mindeniŋgambay kun ak, numiy numam biynimb gunap kuyip, “Kun kun giy niŋnimimb aŋgiy, ma aŋgŋniŋgambay. Biyn bi, kanj kayn maŋgiyse, minim yip ak niŋey tep gakniŋ,

kisen giniᅅgambay ak mey, kuyip kun giy ma aᅅniᅅgambay.

¹² Tap siy tap timey giniᅅgambay ak, kuyip simb niᅅiy kirginiᅅgayn ak mey, gos kun ak niᅅiyiᅅg ma mindeniᅅgayn aᅅgak.”

¹³ Pen minim kisenimb ay aᅅgak kun ak, minim nindnimb tip ak dakniᅅ, minim nindnimb ak kurginiᅅg gisap.

9

Bi Simboᅅgep Nindnimb Gok, Meymey Siyysiyp Likañ Ak Diy, Gor Nup Simboᅅg Ñiyiᅅgipay

¹ Gor minim nind aᅅgak ar ak, nup aᅅniᅅniᅅg, yikop aᅅniᅅniᅅgiy rek ma ayak; kilrimey giy nep aᅅniᅅyiᅅgipay. Kun ak nuk aᅅgek, ser korip bap man ar biy giyak. ² Ser korip kun ak, korip miᅅgan omiᅅal gayak. Korip ñiluk miᅅgan bap gay, korip miᅅgan suᅅ-tep ak aᅅgyak. Miᅅgan kun ak lam bap daᅅgiy ay, boᅅg band bap gay, Gor nup simboᅅg ñinjun aᅅgiy, biret ak minek minek dam ayiᅅgipay boᅅg ar kun ak.

³ Pen korip ñiluk miᅅgan bap, chech yomb yimb ak pil giyak. Miᅅgan kun ak, Gor korip ñiluk miᅅgan suᅅ-tep key yimb ak aᅅgyak. ⁴ Miᅅgan kun ak, mon boᅅg band bap lak ayrep giy, gol di pik pis band ay maᅅgiysekiywiᅅgiy, tap kuyrep wip ak daᅅgiyiᅅgipay ar kun ak. Pen kes gol diy giyak yomb bap, Gor minim kes won aᅅyiᅅgipay ak, kunep mindek. Miᅅgan biyaᅅ Gor low minim aᅅgiy tikak kamb pis omiᅅal ak sek, binak Eron yir kondim dand taᅅgiyiᅅgip gup gak ak sek,

tap mana tiyn gol diy giyak miñgan ak pareyak mindek ak sek ayeý mindyñgip.

⁵ Gor mindip biy añgiy, kes won mindek ar ar siñak, enjol rek omiñal pil band sek pis pis gayak. Tap siy tap timey gipun rek, Gor niñiy kirgañ añgiy, likañ siskoy dap songyñgipay namb kun ak. Tap kun gok minim ak, miñiy parsek añgiy tiknim rek ma ayip.

⁶ Pen tap kun gok mañgiyseý gayey mindakniñ, bi Gor nup simboñgep gok minek minek, ser korip miñgan suñ-tep mis ar ak amiy, Gor nup wong ak giyñgipay. ⁷ Pen bi Gor nup simboñgep yikop kun gok, korip ñiluk miñgan suñ-tep key yimb biyañ amniñgiy rek ma ayak. Simiy nokom nokom, Gor nup simboñgep biyomb yimb ak, siypsiyp likañ dand nep, miñgan kun ak amyñgip. Tap siy tap timey nuk key gak gok sek, biynimb niñrep ma giy, tap siy tap timey giyak gok sek Gor niñiy kirgañ añgiy, likañ ak dand miñgan kun ak amiy, sinasin rek pikyñgip.

⁸ Gak kun ak, Gor Kawnan ak chinup yomek niñbun: ser korip miñgan suñ-tep mis ar ak tap gok mindakniñ, korip ñiluk miñgan suñ-tep key yimb ak amiy, Gor nup añgniñniñgiy rek ma ayak.

⁹ Pen giyñgipay kun ak, Gor chinup biynimb miñiy mindpun ñin biy gok, gosimb niñniñgiy añgiy añgak. Pen opriyñ ñiyñgipay ak sek, meymey siypsiyp tap gok dand apiy, pik Gor nup simboñgyñgipay ak sek kuyip gek, biynimb tep nuk mindeniñgiy rek ma ayak. ¹⁰ Ar kun ak giyñg añgyñgipay, “Tap ak ñiñemb; tap ak ma ñiñemb; ñiñg ak kun giy ñiñemb; kun giy ma ñiñemb. Ñin

ñiᅅg ay gilunᅅg yokiy, kun ginimimb, yikop ak kun ma ginimimb anᅅyiniᅅgipay.” Minim nindnimb niᅅiy tap kilrimey giyiniᅅgipay kun ak; yikop minim kisenimb ak kond mindyiniᅅg, kawnan paᅅg niᅅiy gipay rek ak giyiniᅅgipay.

Jiysis Likañ Nuk Ak Key Diy Nop Nup Simbonᅅak

¹¹ Pen Krays Gor minim kisenimb tep ak dand apiy, bi Gor nup simbonᅅep yomb yimb chin ak mindiy, ser korip biynimb giyak man ar biy ma amnak: Nop ker yipund giy amnak.

¹² Chinup di Nop yip jimñen, perper mindeniᅅgiy anᅅiy, meymey kaw pikiy, likañ di Gor nup simbonᅅyiniᅅgipay rek ma gak; likañ nuk ak key yowak rek, Nop nup simbonᅅak. Pen bi Gor nup simbonᅅep nindnimb gok minek minek, likañ sonᅅiy simbonᅅyiniᅅgipay rek ma gak: chinup di Nop yip jimñiniᅅg, likañ nuk minek nokom yimb, dand Nop korip ñiluk suᅅ-tep key yimb biyon amek mey, perper mindenjun rek ayip.

¹³ Nind biynimb tap siy tap timey giy, asin mindyiniᅅgipay gok apey, bi Gor nup simbonᅅep gok, meymey kaw tap gok pik likañ ak diy, kaw nemb marip bap mon daᅅgiyey pisnep yin binj tikak band gunap diy, ñiᅅg sek, likañ sek tunᅅandik mandik giy, mumbwak kuyip okok yokey, asdey pikiy suᅅ ayiniᅅgip. ¹⁴ Likañ yikop ak yokey, suᅅ ayiniᅅgip kun ak; niᅅind Kawnan perper mindeniᅅgamb ak, Jiysis bi suᅅ-tep yimb ak yip mindiy, chinup nen anᅅiy kumek, likañ yowak ak; chinup gek, Gor biynimb suᅅ-tep nuk gok mindiy, miñ apyap pikpay ar ak kirgiy, Gor

Biyomb perper mindeningamb ak nup gosimb niñiy, direp giningambun.

Krays Likañ Nuk Yowak Rek, Chinup Gor Yip Di Jimñiy Ayak

¹⁵ Pen Krays bi nambnimb ak, Nop minim kisenimb ak dand apiy, chinup biynimb dinim angyi angyak gok, di Nop yip jimñiy ayip. Minim nindnimb ar ak mindakniñ, mindrep ma giy mey; jimñiy mindep rek ma ayak ak pen; Krays kumak rek, Gor yip jimñiy mindiy, perper mindonjun rek ayip.

¹⁶⁻¹⁷ Bi gunap minim kilis ak angyi apay, “Yand kumen, tap yip gok apiyn rek biloknimimb angey, minim kun ak niñiy, yikop nep mindey mindey, pisnep kumey nep, apay rek bilokaypay. Kiyk kim mindyakniñ, tap kuyip ma bilokaypay.” ¹⁸ Kun ak rek, Gor minim nuk Jiwda biynimb kuyip angak ak; meymey kaw pik likañ di songey nep, wos gak.

¹⁹⁻²⁰ Mosis Gor low minim angek tikak gok, biynimb gok kuyip angniñ day jiwiy, kaw ñiluk pik likañ diy, ñiñg gunap sek songyi, tap haysop apay alik kind ak diy, siypsiyp kas ak di day biyon tiwningiy, ñiñg likañ kun ak tawiy, low minim buk kun ak sek, biynimb ap mindeyak gok sek yokek, asdey pikek angak, “Likañ yoken nimbip asdey piksap kun biy, Gor minim ak pisnep niñdiningambun angyi gispiyn angak.” ²¹ Pen ñiñg likañ gunap diy, Gor angninep ser korip ak yokek, asdey pikiy, diys tap yerip yerip mindek korip kun ak, asdey pikiy gak. ²² Minim nindnimb ar ak tap mangyisek rek, Gor niñek tep ma gak; likañ diyokey, asdey pikek nep, niñek tep

giyিংgip. Biynimb tap siy tap timey gey, yikop niñiy ma kirgak; siypsiyp gok pikey likañ yapek, dap simboᅇg geyak mey; tep aᅇgiy, niñiy kirgak.

Krays Chinup Aᅇgiy Kumiy, Gach Chinup Wiykyokip

²³ Tap kilrimey ser korip man ar biy giyিংgipay kun gok, Gor nuk key gip rek, biynimb gok niᅇniᅇgiy aᅇgiy, aᅇgek giyিংgipay. Jiysis tap yikop kiyk pik simboᅇgiyngipay kun gok nep, miᅇmon tep biyoᅇ gombikop, yergiy tep gipkop. Kun ak nuk simboᅇgiyn aᅇgiy, key yimb ar ak gak. ²⁴ Nuk key kumiy tip ak tikjakiy, Gor aᅇgniᅇp korip biynimb giyak miᅇgan ak ma amnak; Nop ker yipund giy amiy, tap siy tap timey gipun rek, chinup nen Nop nup aᅇgniᅇ mindip. ²⁵⁻²⁶ Yisrel bi Gor nup simboᅇgep yomb yimb gok, simiy nokom nokom, likañ kiyk key mer, siypsiyp tap gok pikiy likañ diy, Gor nup simboᅇgniᅇ, korip ñiluk suᅇ-
tep key yimb miᅇgan ak amyিংgipay. Pen Krays ar kun ak rek gipkop ak, wosrey miᅇmon alwol gayak ñin ak tikiy, mind dand apiy mindpun ñin biy, per simiy gok simiy gok chinup aᅇgiy, yiwur diy kumbikop. Pen ñin tapin pandikip ñin biy, biynimb mindyিংgipay gok, mindpun gok, mindeniᅇgambay gok tap siy tap timey gach ak, minek nokom yimb chinup maᅇgiysek aᅇgiy kumak.

²⁷ Biynimb gok minek nokom yimb kumiy, kisen kor yomb ak niᅇbay rek, ²⁸ Krays biynimb nokom nokom maᅇgiysek timey gipay rek, minek nokom yimb kumiy, tip ak tikjakak. Chinup aᅇgiy ñin nokom kumak ak, kisen tip ak ma

kumningamb. Pen tip andkind winingamb ñin ak, biynimb tap siy tap timey gipay gok kuyip, simbong giyn angyi ma winingamb; biynimb nup tep gakniñ kond mindpay gok kuyip, pisnep diniñg winingamb.

10

Simbongep Nindnimb Ak Gach Ma Wiykningamb

¹⁻² Jiwda low niñiy, siypsiyp tap gok pik simbongyigipay ak, yikop kisen giningamb rek, kawan panğ niñiy gipay rek giyigipay. Giyigipay kun gok, simiy ak simiy ak per giyigipay ak pen; mindrep giniñgiy rek ma ayak. Kisen giyak ñin ak, kuyip gek pisnep suñ-tep mindembiyap ak; gos kuñay niñiy, tip ak giy tip ak giy ma gipyap. ³⁻⁴ Pen tap siy tap timey gipun ak, siypsiyp tap gok pikon likañ yapek, Gor niñiy ma kirginimuñ rek ayip angyi, simiy ak simiy ak simbongyিং nep mindyigipay. Minek minek simbongyigipay kun ak, gos yomb amnak tap siy tap timey giy, mindrep ma giyak ar ak.

⁵⁻⁶ Kun gek, Krays man ar biy wining, Nop nup angak,

“Tap pik likañ yapek simbongipay ak, nip tep ma gip. Pen tap kun gok dangiyey pisnep yin binj tikip ak, kunep nip tep ma gip rek, mumbwak yip bap gaynak. ⁷ Gayenak, yand nip angnik, ‘Bapiy, Yip mumbwak gayey, wosrey buk tikiy angyak rek opiyn ak; angningamban rek giniñgayn angnik’ angak.”

⁸ Krays minim kun ak omiñal angak. Minim bap ak angak, “Bapiy. Biynimb nip simbonḡning, kanj siypsiyp tap gok pikey likañ yapek akan, pisnep dangiyey simbok amek, nip tep ma gip angak.” Low buk tikiy ginimimb angyak rek, simbonḡningambay ak pen; Nop nup tep ma giniḡgamb angak. ⁹ Pen minim bap angak, “Bapiy. Nip kond mindpiyn. Yip yerip anḡniḡgamban ak, anḡniḡgamban rek giniḡgayn angak.” Ñinuk minim kun ak angek, Nop minim nindnimb siypsiyp tap gok pik simbonḡyiniḡpay ak kirgiy, minim tep kisen angak ak gek wos amimb. ¹⁰ Kun ak Krays Nop minim ak niñiy, tap siy tap timey gipun gach ak wiykyokniḡ, minek nokom yimb pisnep simbonḡgak ak mey; chin biynimb nuk gok suñ-tep mindpun.

Krays Kumak Ar Ak Nep, Gach Wiykyokniḡgamb

¹¹ Bi Gor nup simbonḡgep yikop gok, tap siy tap timey gipun ak, Gor niñiy kirganḡ anḡiy, minek minek tap pik simbonḡipay ak pen; ar kun ak gey, Gor niñiy pisnep kirginimuḡ rek ma ayip.

¹²⁻¹³ Pen Bi Gor nup simbonḡgep aspun ak, Bapiy biynimb tap siy tap timey gipay ak niñiy kirginimuḡ rek aynimuḡ anḡiy, ñin nokom yimb kumiy, woḡ kun ak gi dipiyn anḡiy, am Nop ñin yipund kind okok ken bisgak.

¹⁴ Yenen: nuk ñin nokom yimb kumak rek, biynimb nuk suñ-tep mindeyanḡ anḡiy dip gok, Gor dinimuḡ rek ayip. ¹⁵ Gor Kawnan ak kunep, chinup minim kun ak rek anḡñimb. Nuk biynimb

gos ñek, Baybol buk ak tikiy, minim kun ak rek angyiy angyak:

¹⁶ “Biyomb angyip, ‘Kisen yand giningayn ak: kiy yip minim angy ar nokom ay, jimñiy mindiy mey; low yand gok gosimb namb kuyip biyan tikayen kisen giying, sakiy ma giningambay’ angyip angyak.” ¹⁷ Pen minim bap angak, “Low yip timbrikiy, tap siy tap timey giyak ak ninjiy kirgiy, tip ak ma ninningayn angak.”

¹⁸ Ninjiy pisnep kirginingamb kun ak, nuk yip jimñiy mindiy mey; tap pik dand apiy simbongniyingipay rek, tip ak ma giningambun.

Gor Nup Chingrep Giy Man Winjun

¹⁹⁻²⁰ Kun ak mam ay sikop, gos kunay ma ninjun. Jiysis chinup angyiy mumbwak nup timey gey kumek, laplap yomb korip ñiluk miñgan suñ-tep key yimb pil giyak ak pungrikiy, kinjen pisnep yikak.

²¹⁻²² Pen kunep, nuk bi Gor nup simbonjep yomb yimb chin ak mindiy, Gor nup simbonqip rek, nup gosimb ninjiy, mindip man siñak winjun. Chinup gos yomb ma niñyan angyiy, Ñinuk nup yokek apiy kumek, likañ nuk yowak rek, chinup ñiñg yomb rek pikek mey, biynimb nuk mindpun.

²³ Kun ak Gor minim chinup angayek niñnuk ak, ma kirginjun, chinup diniñgamb angyiy, gos sek kond mindenjun. ²⁴ Pen biynimb gunap kuyip simb ninjiy don, kiy pen biynimb gunap kuyip simb ninjiy dey, penpen wasemb ay penpen diy mey, mangiysek mindrep giningambun.

²⁵ Biynimb gunap Gor minim ninjun angyiy, ap

nan-giyiᅅipay ak pen; kisen kirpay rek ma ginjun; maᅅ mindip Jiysis winiᅅgamb aᅅgiy ap nan-giyiᅅ, minim niᅅbun ak penpen aᅅᅅiᅅiᅅ, mindrep ginimimb.

Jiysis Nup Kirginiᅅgambun Ak, Pisnep Apyap Pikniᅅgambun

²⁶ Yenen: Krays minim yipul yimb ak aᅅgey niᅅ-tep giy, pen andkind tap siy tap timey ar ak amiy, tap Gor nup pik simboᅅgon, chinup dinimuᅅ rek bap ma mindeniᅅgamb. ²⁷ Ar kun ak, kinjeᅅ chin bap ma mindeniᅅgamb; niᅅind nup pirikniᅅgambun. Kor ak sek, mon maᅅlaᅅ biynimb nup miluk niᅅeniᅅgambay kuyip sinj timey yinimb ak sek kond mindoniᅅgambun. ²⁸ Biynimb Mosis low tikak gok niᅅiy, tap yikop rek ayek timbrikyak gok; biynimb omiᅅal akaᅅ, omiᅅal nokom windin niᅅey, kor giyiᅅipay ᅅin ak, kuyip simb niᅅnimuᅅ rek ma ayek, biyomb gok minim kun ak niᅅrep giy, aᅅgey pisnep pik ayiᅅipay. ²⁹ Kun ak chin Gor Niᅅuk ak nup alemb alemb ᅅiniᅅgambun ak, yergiy kim amniᅅgambun. Nup alemb ᅅiniᅅgambun kun ak, likaᅅ tep chinup Gor yip di jimᅅiy aynim aᅅgiy gek yowak ak, tap yikop rek ayek, kun giniᅅgambun. Pen Gor Kawnan chinup simb niᅅimb ak, nup kunep timey giniᅅgambun. ³⁰ Gor nuk key aᅅgak, “Biynimb timey giᅅipay gok, yand nokom, kuyip pen timey giniᅅgayn aᅅgak.” Pen minim bap aᅅgak, “Biyomb ak nuk key, biynimb nuk gok kuyip kor niᅅiy, minim aᅅniᅅgamb aᅅgak.” ³¹ Pen Gor biyomb yimb perper mindip

ak, biynimb gok kor geningamb; niñind jel giningamb.

Gor Anġip Rek Gon Amnimun

³² Pen nind giyiñgipim ak sakiy ma ginimimb. Gor melik tep niñiy denbik, biynimb nimb gok nimbip miker yomb ñiyak ak pen; nup ma kirpik.

³³ Ñin gunap nimbip minim timey anġiy, timey giyiñgipay ak pen; gos kun ak ma niñiy, biynimb wikan gunap kuyip timey giyakniñ, kun okok ken amyñgipim. ³⁴ Biynimb Gor nup gosimb ak niñey, kalambis ayak gok, simb niñyiñgipim. Ap tap nimbip mañgiysek dand okok nimb okok nimb gey, “Ak tap yikop; gos chin ak amimb Gor tip chinup gayek, perper mindeniñgambun biyon anġiy,” gos yomb kun ak ma niñbik. ³⁵ Kun ak sisiñ ma aynimimb; Gor nup nokom gosimb ak niñmindiy mey, perper mindeniñgambim. ³⁶ Nup ma kirgiy; anġip rek gon amek mey, anġak rek chinup giningamb. ³⁷ Baybol buk ak tikiy anġyak: “Bi winiñgamb ak per ma mindeniñgamb; mañ mindip winiñgamb. ³⁸ Biynimb suñ-tep yand gok, yip gosimb niñmindeniñgambay ak pen; gunap yip kirgey, tep ma giningamb anġyak.”

³⁹ Pen chin biynimb Gor nup kirgiy, apyap pikpay gunap ma mindpun; biynimb nup gosimb niñiy, perper mindeniñgambay gok mindpun.

11

¹ Gor nup windin ma niñbay ak pen, biynimb nup gosimb niñbay gok, mindip anġiy niñrep yimb gipay. Nup gosimb niñiy mey, chinup kond

mindeningamb angyi, nup gos sek kond mindpay.
² Biynimb wosrey kay, nup gosimb niñyak rek, kuyip angak, “Nimbip niñen yip tep gip angak.”

³ Nup niñind angyip angyi gosimb niñbay ak mey; tap semb biyon, tap man biy, tap bap diy ma gayak, minim anep angek ayak ak niñbun.

Ebol, Yinok, Nowa Gor Nup Gosimb Niñyak

⁴ Wosrey binak Ebol Gor nup gosimb niñiy, minim angyip gok niñind angyip angyi mey, tap dand apiy pik simbonḡnek, Gor niñek tep gak. Pen numam Keyn tap dand apiy simbonḡnak ak, Gor niñek tep ma gak.

Ebol Gor nup gosimb niñiy, niñind angyip angek mey, nup pen bi suñ-tep yand angyi, tap simbonḡnak ak niñiy, yip tep gip angak. Ebol kumiy amek, miñiy yip ma mindpun ak pen, nuk Gor nup gosimb niñak kesim kun ak, chinup biynimb gunap gos niñiyng nep mindip.

⁵⁻⁶ Biynimb Gor nup gosimb niñbay gok nep, nuk yip jimñiy mindeningiy rek ayip. Yenen: nuk biynimb yikop ma diningamb; biynimb, nuk mindip ak mey nup anḡniñon, chinup minim anḡayip rek giningamb angyi niñbay gok nep diningamb. Yinok nuk bi kun ak rek. Gor nup gosimb niñmind dand amiy ma kumak, Gor nup dand amek mey; nup piyowiy ma yimb niñyak. Baybol buk ak tikiy angyak, “Gor Yinok nup niñek tep gek, dand amnak angyak.”

⁷ Gor Nowa nup kunep: miñmon yomb pikningamb angek, windin ma niñak ak pen, Gor nup gosimb niñak rek niñind angyip angyi, siyip yomb ak gak. Siyip yomb kun ak giy, biyn nuk

ñapan nuk gok mañgiysek miñgan kun ak amdey, miñmon yomb yimb ak pikek mindrep giyak. Pen miñmon pikniñgamb angek, windin ma niñak ñin ak, Gor anġip ak niñind anġip anġiy, gek amek mey, nuk kim amnakniñ, biynimb yikop gok, Gor nup minim bap pen anġniñgiy rek ma ayak.

Ebrahim

⁸ Basind yes Ebrahim kunep, Gor nup gosimb niñiy, anġak rek gak. Nop miñmon ak mindakniñ Gor anġak, “Ñapan nand tikenিংgamban tikey amniñgamb gok, nimbip miñmon yomb bap pisnep anġniñgayn ak mey; am kun okok mindenimin anġak.” Angek, miñmon kun ak mindip okok anġiy ma niñak; yip kond mindeniñgamb anġiy, monmon amnak. ⁹ Pen am mindek kun ak miñmon nuk mer, biynimb gunap miñmon kiyk. Nuk kun giy mindiy, ser korip nep giy kin tanġiy, ñinuk Aysek nup tikak. Tikek yomb giy, nop gak rek nep gak. Aysek ñinuk Jekop nup tikek yomb giy, kunep gak. ¹⁰ Gor miñmon kilis-tep per mindeniñgamb anġiy gayak ak, am mindoniñgambun anġiy, Gor nup gosimb niñiy, ser korip nep giy kin tanġyiniñgiy.

¹¹ Pen Ebrahim biynuk Sera tokiy yimb ay, Gor anġip rek chirup giniñgamb anġiy, nup gosimb niñmindiy, ñi Aysek nup tikrik. ¹² Ñapan nuk kun ak tikek, tik dand amiy apiy giy; gap, kamb kilup, tap okok kuñay yimb mindek, ma ñin pañgniñbay rek ak tikyak.

¹³ Bi wosrey aspun kun gok, Gor kuyip yerip yerip angek, anġak rek nep chinup giniñgamb anġiy, nup gosimb niñmindeyak ak pen; anġak

kun ak gek ninjiy, ma kumyak. Pen gos yomb kun ak ma ninjak, miñmon nuk amiy niñningambun anjiy, tep gakniñ mindiy kumyak. Lum ar biy mindiy angyiñgipay, “Chin biynimb key okok nimb gok, yikop ap namb biy mindpun angyiñgipay.” ¹⁴ Biynimb minim kun ak rek apay gok, miñmon chin yipund giy bap mindip ak anjiy ninjiy, kun apay. ¹⁵⁻¹⁶ Miñmon kiyk kiring wiyak ak gos amek, andkind ambiyap ak pen; gos yomb kiyk amnak Gor miñmon tep biyoñ. Nuk pen dawin yomb ak gayrep giy, biynimb kun gok rek kond mindip ak mey; biynimb kun gok rek nup Biyomb Gor chin apay ak, nuk niñek tep yimb gip.

¹⁷⁻¹⁹ Pen Gor, Ebrahim angingayn rek giningamb akan anjiy, nup angak, “Ñi nand Aysek tikek tikey amiy apiy giy, kuñay mindeningambay angnik ak, nup dam pikay, yip simboñg ñinimin angak.” Angek, Ebrahim Gor nup gosimb ninjiy angak, “Ñapan yand kun ak tikek tikey amiy apiy giy, kuñay mindeningambay angak minim ak ma kirginingamb; ñiyand nokom yimb ak pik ayen, nuk gek tip tikjakningamb anjiy,” ñinuk Aysek nup dam bind ar ak tiwning ay, ñayip diy piñiy ayning gek, Gor kun ma ginimin angak. Kun ak ñinuk Aysek nup pisnep kumak rek ayak ak pen, nup kim diy dand andkind amnak.

²⁰ Aysek pen yomb giy, ñi omiñal tikak. Ñi bap yimb ak Jekop; ñi bap yimb ak Yisow. Pen nop Aysek tokiy yimb ay, Gor anqip rek giningamb anjiy, ñinuk omiñal kuyip tap yerip kisen giningamb minim tep ak, gunap nind angnak. Kumek kisen

anggak rek nep gak.

²¹ Pen ñinuk Jekop tokiy yimb ay, Gor nup gosimb niñiy, angip rek giniñgamb angiy, ñinuk Josep ñi tikak omiñal ak kuyip, Gor nirip kond mindyিং, kun kun giniñgamb angiyñ angiy, yir kondim ak diy, jiy kuyangiy mindyিং, kuyip-miñay Gor minim tep kun ak, gunap nind angñak. Kumek kisen anggak rek nep gak.

²² Ñinuk Josep pen tokiy yimb ay, Gor nup gosimb niñiy, giniñgamb rek niñrep giy, minim gunap kunep anggak. Biynimb nuk gok kuyip anggak, “Kisen miñmon Yijip biy kirgiy, andkind miñmon Keynan amniñgambim. Ñin kun ak, tinjiy yip gok sek dand amiy, kaw dinimimb kun okok anggak.” Angiy, kumek kisen mey, kuyip anggak rek manjiysek giyak.

Mosis Nup Tik Weygirik

²³ Mosis nonim nop ber kunep, Gor nup gosimb niñiy, chinup kond mindeniñgamb angiy, Yijip biyomb Perow nup ma pirikrik. Ñi tep Mosis nup tikiy, takin omiñal nokom weyger mindek. Pen kisen Perow panuk ap Mosis nup dand amiy, biyn bap key ñispiyñ angiy nonim nup ak key ñek, tiy ñiyiñgip. ²⁴ Mosis yomb giy, nuk kunep Gor nup gosimb niñiy, yip kond mindeniñgamb angiy anggak, “Yip Perow panuk ñinuk ma angniñgiy. ²⁵⁻²⁶ Lum ar biy tap siy tap timey giyিং minden, yip tep ma giniñgamb; perper mindenim angiy, krays nup chinggen, yip angjiwningambay ak tep yimb; pen Yijip biynimb amemb owep tap tep tep kiyk gok, yip tep ma gip anggak. Yand biynimb

Gor ker mindey timey gipay gok, yip yingong giy mindenim angak.”

²⁷ Pen Mosis Bi windin ma niñbun ak nup gosimb niñiy mey; misen niñnimuñ rek ayek, kiñ Perow nup miluk niñak ak ma pirikak; Gor angak rek giy, Yisrel biynimb kuyip poñind Keynan amnak. ²⁸ Pen nuk Gor nup gosimb niñiy angek, Yisrel biynimb Pasopa siypsiyp ñiluk gok pikiy likañ diy kinjenrumb pis pis pikiy, day ar biyon sek pikey, enjol ap Yijip biynimb ñi nind tikyak gok mañgiysek pikayning, Yisrel biynimb korip kuyip ak ma awak.

²⁹ Yisrel biynimb Gor nup gosimb niñey, Yijip kay kuyip wirsek yukey, am ñing solwara Likañ ak tikning giyakniñ, Gor gek ñing kun ak ling pis pis amek, lum ar ak amiy, kind bindon amniyak. Pen Yijip kay kuyip yuk dand namb kun ak apeyak, ñing ap kuyip yiw gek mañgiysek kumdiyak.

³⁰ Kisen Yisrel biynimb Gor nup gosimb niñiy, am dawin yomb Jeriykow kamb wariy kilis ak, ñin onep ar ak kus kus gey gey pisnep wakanjsakak.

³¹ Pen kesim ar nokom kun ak nep, kinjenram biyn Reyap miñmon Jeriykow nimb ak, Gor nup gosimb niñiy, biynimb Gor nup minim kirgiyak gok yip ma kumak. Yenen: bi Yisrel ominal miñmon Jeriykow amer, kuyipminay pikayning gey, Gor nep angek miñmon chinup niñayning opiy angiy, di kasin gek, kim mindiy andkind amnirik.

³² Pen biynimb Gor nup gosimb niñey, kuyip key yimb gak kesim gok, yergiy parsek angnim.

Binak Giydiyón, Barak, Samson, Jepta, Depiyt, Samwel bi gok sek, bi Gor minim anjep gok sek giyak giyak rek anjen, minim paryomb anningamb. ³³ Biyn bi kun gok: gunap Gor nup gosimb niñiy, biynimb miñmon key gunap kuyip yuk yokyak; gunap minim yomb gok Gor gos tep niñimb rek tunjasikyak; gunap kuyip kayn ayndik layon mindeyak namb ak diyokeyak, Gor kuyip kond mindek ma siwyak; gunap Gor kuyip minim anjek, anjep rek giningamb angy kond mindey mindey, angak rek nep gak. ³⁴ Pen gunap mon yomb yinek namb ak diyokeyak ma yinak; gunap baynat diy kuyip piñiy ayun angyak ak pen; kuyip piñiy ayningiy rek ma ayak. Biynimb kun gok biynimb sayn ak pen; kuyip kond mindek kilisrimey yimb mindeyak. Penpen giying, amiy biyomb miñmon okok nimb gok kuyip, yuk yokyak. ³⁵ Biyn gunap ñapan kiyk gok kumeyak, Gor nup gosimb niñey, gek tip ak tikjakyak.

Biynimb gunap Gor nup gosimb niñyak rek, kuyip miñ ayey kumyak. Gor nup kirgembiyap, kuyip wisik yokey ambiyap ak pen; perper mindenjun angy, Gor nup chingiy nep mindeyak rek, kuyip timey gey gey kumyak. ³⁶ Gunap kuyip anjiwi, tapin pikyak. Gunap tiwningiy, kalambis yokyak. ³⁷ Gunap kamb silok pikayey kumyak; gunap kuyip sow diy timbrik day day ayak. Gunap baynat diy, kuyip pisnep piñiy ayak. Gunap kuyip yukyok gey gey kosyam mindiy, simbgeprek meymey siypsiyp wak diy, chech rek yimiy girangyngipay. ³⁸ Pen biynimb yikop gok, biynimb tep kun gok kuyip, chin yip mindep rek

ma ayip anġiy, kuyip timey gey gey, pirik am miñmon nep namb okok mindiy, kamb miñgan man miñgan okok kin tanġyinqipay.

³⁹ Biynimb aspun kun gok, Gor nup gosimb niñiy mind tep yimb giyak ak pen; kuyip direp giniñgayn anġak rek, ñin kun ak ma gak. ⁴⁰ Yenen! Chinup kunep diniñg, niñayak rek, ñin nokom kun ak nep mañgiysek den, am jimñiy mindrep giniñgiy anġiy niñak.

12

¹ Kun ak biynimb kuñaynep chinup piñiy kus kus giy, kinjeñ tep yomsipay ak; tap gos yomb niñbun gok kirgiy, tap siy tap timey chinup kasek chinġinimuñ rek ayip ak kirgiy, kinjeñ tep yomsipay ak dinjun. Kinjeñ tep ar kun ak, kosyam amniñgambun anġiy, gos ak ma niñjun. ² Biyomb chin Jiysis nup gosimb niñiy, nuk gip rek ginjun. Nup ñanġrimbikayniñg gey, yip bi timey rek ñanġbirikayey nambiñ diniñgayn anġiy ma anġak, biynimb gok kuyip anġiy kumiy, Bapiy ñin yipund kind okok ken am mindeniñgayn anġiy, nup tep yimb gak.

Gor Chinup Mindrep Giyan Anġiy, Miker Gunap Ñimb

³ Biynimb kuñaynep nup miluk niñiy, timey giy gey amek, ma pirikak. Chin gak ar kun ak, kunep ginjun. ⁴ Nuk mey, chinup suñ-tep mindeniñgiy anġiy kumak. Nimb pen, tap siy tap timey ma giy, nup chinġiy nep mindonjun anġiy, miker yomb kun ak rek ma dipik. ⁵ Gor nimbip ñapan yand

angiy, minim tep angek tikyak ak, sakiy gipim rek ayip. Nuk angak:

“Ñapan yand guniy! Biyomb ak nimbip gos winjkiyng miker ñiningamb ak; gos yomb ma niñnimimb. Tap siy tap timey gem, nimbip ang giningamb ak, chinup pisnep kirgip angiy, gos kuñay ma niñnimimb. ⁶ Biynimb nup tep gip ak, ñapan nuk gok mey, kuyip per gos winjkip angak.”

⁷ Kun ak kosyam mindeningambim ak, gos kuñay ma niñnimimb; Bapiy chinup gos winjksap angnimimb. ⁸ Pen nimbip timund ma winjkip angiy; biynimb nop sek ma mindpim gok mey kun gip. ⁹ Bapiy chin man ar biy gok, chinup timund winjkey, tep winjkipay angiy niñbun. Kun ak rek, Bapiy chin semb biyon timund winjkek, tep yimb kun gip angiy niñjun.

¹⁰ Bapiy chin man ar biy timund winjkipay gok, sikoy won bap mindeyan angiy, gos key niñiy timund winjkipay. Pen Bapiy yomb chin semb biyon chinup gosimb niñiy, suñ-tep mindpiyn rek nep mindeyan angiy gos winjkip ak; angip rek ginjun. ¹¹ Chinup timund winjkip won ak, tep ma gip ak pen, timund winjkek suñ-tep mindiy mey; kapkap mindrep giyng gon amningamb.

Gos Wos Niñiy Gon Amnimun

¹² Ñin tomb sayn gi yowip ak; yikop gip angiy, tikjak amiy apiy gem kilis ginimun. ¹³ Kinjen yipund giy tep tep ar ak amem, gunap tomb punjjiwonimun, kilis giy am gem gem, suñ ayningamb.

¹⁴ Biynimb gok yip maŋgiysek jimñiy mindenjun aŋgiy mindenimimb ak pen; Gor biynimb suŋ-tep nuk mindenimimb. Biynimb suŋ-tep gok nep, Biyomb chin ak nup niŋŋambay.

¹⁵ Kun ak niŋrep ginimimb. Biynimb nimb gunap, Biyomb chinup simb niŋiy dip ak nup, kirginiŋiy rek ayip. Pen biynimb mindrep giniŋambay gok, biynimb mindrep ma gipay namb ak mindey, kuyip asiŋ wilikniŋgamb.

¹⁶ Pen biynimb nimb gunap biyn siy bi siy giy, Gor nup kirginiŋiy rek ayip. Giniŋambay kun ak, Yisow wosrey gak rek giniŋambay. Nup yiwan gek, tap ñiŋiyn aŋgiy, Gor nop Aysek bilesiyŋ tep ñek ñinuk nup ñiniŋ gak ak, tap yikop rek ayek kirgiy, tap keñmaŋgiy won ak nep ñiŋemb ak dak.

¹⁷ Pen nimb niŋbim: kisen nop tap ñiniŋ gak kun ak tip diyn aŋgiy, kinjen dinimuŋ bap ma mindek, simb gek siy aŋgak.

Gor Miñmon Tep Nuk Sayon Amjipun

¹⁸ Yisrel biynimb miñmon Saynay dum ak am mindey, Gor minim nuk nind aŋgayak ak, Mosis nup aŋgakniŋ, mon yomb yimb yiniy, kisyim jimbenjimb apiy, yiŋgen yomb apiy gak. ¹⁹ Pen biykul yomb ak aŋgiy, minim semb biyoŋ nimb gunap aŋgek, biynimb gok pirikiy, Mosis nup aŋgyak, “Minim asap kun ak rek, tip ak aŋgek ma niŋjun aŋgyak.”

²⁰ Yenen: Gor kuyip aŋgak, “Biynimb, meymey, siypsiyp tap gok yirik kun ak ameniŋiy, kamb silok pisnep pik ayep aŋgak.”

²¹ Kiyk minim niŋiy pirikyak kun ak, Mosis kunep niŋiy jep diy pirikak.

²² Kiyk miñmon dum amniyak kun ak; miñmon nep dum ak amniyak. Nimb Biyomb permindep minim nup kisenimb anğayip ak dipim gok, enjol kuñay yimb nep tep gakniñ, mindpay miñmon Sayon dum opim ak mey, Jerusalem semb biyoñ ak opim.

²³ Pen Biyomb biynimb mañgiysek bilokniñgamb ak, yimb nimbip ak biynimb nuk nindnimb gok sek tikayek mindip. Biynimb kun gok kumiy ma kurgiyak, am nuk yip mindrep yimb gipay. ²⁴ Kun ak minim kisenimb ak niñiy, Jiysis ker opim ak tep gipim. Keyn numam Ebol nup pikek likañ yowak ak, minim yomb yimb dak; pen Jiysis likañ ak chinup nen anğiy yowak rek, Gor yip jimñiy mindonjun rek ayip.

Niñrep Ginimimb

²⁵ Kun ak niñrep ginjun. Biynimb Saynay dum mindiy, minim anğek ma niñyak gok, kim amniñiy rek ma ayak ak, minim nuk kisenimb ak kirgoniñgambun; chinup yerip rek giniñgamb.

²⁶ Ñin kun ak kuyip minim anğakniñ, monmon rek dak. Pen chinup anğak, “Kisen kun ak rek gen; tap mankumb biy, semb biyoñ mañgiysek kawin kawin giniñgamb anğak.” ²⁷ Giniñgamb anğak kun ak, tap per ma mindeniñgamb anğiy gayak gok, mañgiysek kurginiñgamb; tap perper mindeniñgamb anğak gok nep mindeniñgamb. ²⁸ Tip chinup anğayip ak, kawin ma giy mindnep mindeniñgamb kun ak, nup gosimb niñiy, tep gakniñ yimb nup dand aranjun. ²⁹ Biyomb chin mon rek yinimb ak; niñrep ginjun.

13

Mam Ay Gunap Kuyip Wasemb Yimb Ayjun

¹ Mam ay gok yip penpen wasemb aying nep mindenimimb. ² Biynimb okok nimbip ker apeningiy, kuyip dinimimb. Biynimb gunap, biynimb yikop gok wasiw angdipun angyi, enjol gunap kuyip wasiw anj diyak. ³ Mam ay gunap kalambis mindeningiy, chin yip kalambis mindpun angyi niñnimimb. Mam ay gunap kosyam mindeningiy, chin yip kosyam mindpun angyi niñnimimb.

⁴ Biyn bi dipay ak tep gipay. Biynimb gunap ap bi beriyminay minim pisnep apay kun ak, ma timbrikningiy. Gor biynimb biyn bi diy, kisen biyn siy bi siy giningambay gok sek, biynimb yikop biyn siy bi siy giningambay gok sek minim yomb yimb angingamb.

⁵ Tap chin dipun gok sikoy gip angyi, gur-maniy tap gok gos yomb ak ma ninjun. Gor angak, “Nimbip sakiy ma giningayn; nimb yip nep mindeningayn angak.” ⁶ Kun ak gos okok gunap ma ninjun. Biyomb chinup kond mindip rek, biynimb gunap chinup yergiy timey giningambay angyi, ma pirikjun.

Minim Biyomb Nimbip Angey Niñbik Ak, Sakiy Ma Ginimimb

⁷ Biyomb nimbip minim tep angey niñbik gok, Gor nup gosimb niñiy, gey amek tep gak ak niñbim. Ar nokom kun ak nep ginimimb. ⁸ Jiysis gumon wos rek ak perper yimb mindip. ⁹ Nuk chinup simb niñiy dip rek, Gor biynimb tep nuk mindpun. Biynimb gunap minim key angingiy

ma ninjun. Biynimb kun gok tap ak ñinemb, tap ak ma ñinemb angyi, asik mosik gi mindpay ak pen; tap kun gok gek mindrep ma giningambay.

¹⁰ Bi Gor nup simbonjep makaw meymey pik simbonj gi mindpay gok; ar kun ak nep gey amek, Jiysis chinup nen angyi kumiy, tap ñinemb nuk yimb chinup ñimb ak; kuyip ñinimuj rek ma ayip.

¹¹ Kiyk makaw meymey pikiy likañ gok, dam Gor nup simbonjep biyomb yimb ak nup ñey, nuk pen biynimb tap siy tap timey gipay rek, dam Gor korip ñiluk miñgan suñ-tep key ak soñgip. Nonim gok pen dam, mindpay mis ar siñak dangiyey pisnep yin simbok amimb.

¹² Kun ak rek, Jiysis biynimb nuk gok suñ-tep mindeyan angyi, miñmon yomb Jerusalem mis ar ak amiy yiwur yomb diy, likañ yapek kumak.

¹³ Nup kisen ginjun angyi ninbun rek, biynimb yikop gok gey amimb ar ak kirgiy, nup ker mis ar ak amon, chinup nup anjjiwyak rek monmon anjjiwniñgiy. ¹⁴ Yenen: man ar biy, perper mindonjun tip bap ma mindip ak pen; miñmon kun ak rek mindonjun angyi kond mindpun.

¹⁵ Nind Gor nup meymey, kaw tap gok pik simbongyingipay ak pen; miñiy Jiysis ap chinup angyi kumak rek, tap kun gok ma pikñiniñgambun. Nup tep ginimuj angyi, menj miñgan dand araniy, yimb nup ak per dand aranjan. ¹⁶ Pen gos sek mindiy, biynimb direp giying, opriyñ ñimbay rek, tap penpen bilok ñinjun. Ar kun ak gon mey, Gor nup tep giningamb.

¹⁷ Biyomb nimbip Gor minim apay gok, gos peying niñiy ma apay, wonj gipun ak Gor

ninjek tep giniŋgamb aŋgiy, gos ak niŋyinj gi-
pay. Kun ak nimb siskoy diy, apay rek gin-
imimb. Kun geniŋgambim, tep gakniŋ wonj
giniŋgambay. Mer ak, nimbip yergiy kond min-
drep giniŋgambay?

Gor Nup Aŋgniŋem Chinup Kond Mindonimuŋ

¹⁸ Pen Gor nup aŋgniŋem, chinup kond min-
donimuŋ. Gor yip mindrep giy gos par ayiŋ
ma mindpun ak pen, per kun ak rek nep ginjun
aŋgiy mindpun. ¹⁹ Gor nup aŋgniŋem, yip kond
mindakniŋ, mindpim ak kasek ninim.

²⁰ Gor bi tep biynimb simb niŋimb ak, gos yomb
ma niŋniŋgiy aŋgiy, Niŋuk biynimb kond mindrep
gip ak nup yokek apiy, kumiy tip ak tikjakak.

²¹ Nop minim nind aŋgayak ak, kindik ginjun rek
ma ayak; pen miŋiy, minim kisenimb dand wip
ak, chinup kond mindakniŋ, mindrep giy aŋgip
rek giniŋgambun. Kun ak Jiysis yimb nup, perper
nep dand aranjun! Tep.

Minim Day Gunap

²² Pen mam ay sikop. Nimbip yiruk ma ginimuŋ
aŋgiy, minim paryomb ma apiyn; maŋ won ak
apiyn.

²³ Mam chin Timotiy nup kalambis ayak ak,
miŋiy mis apek, yip niniŋgambur.

²⁴ Biyomb nimb gok sek, biynimb yikop Gor ker
mindpay gok sek, “Nimb mindpim!” aspun.

²⁵ Gor nimbip kond minden.

**Kalam Baybol Buk Gor minim nuk kisin
angayak
The New Testament in the Kalam Language of Papua
New Guinea
Nupela Testamen long tokples Kalam long Niugini**

copyright © 1992 Wycliffe Bible Translators, Inc.

Language: Kalam

Dialect: central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-06

PDF generated using Haiola and XeLaTeX on 21 Feb 2024 from source files dated 31 Aug 2023

1491c109-3ee2-5565-9b83-06c480168547